

15 FEB 2001

MENTERI LUAR CUBA LAWAT MALAYSIA MINGGU DEPAN

KUALA LUMPUR, 15 Feb (Bernama) -- Menteri Luar Cuba Felipe Perez Roque akan melakukan lawatan rasmi selama tiga hari ke Malaysia bermula Isnin ini bagi meningkatkan hubungan dua hala dan menggalakkan kerjasama ekonomi.

Kementerian Luar dalam satu kenyataan hari ini berkata lawatan itu, yang pertama dilakukan oleh Roque ke Malaysia sejak memegang jawatan itu pada Mei 1999, adalah atas jemputan Menteri Luar Datuk Seri Syed Hamid Albar.

Roque akan diiringi tiga pegawai Kementerian Luar Cuba, kata kenyataan itu.

Semasa lawatan itu, beliau dijadualkan mengadakan perbincangan dengan Syed Hamid selain mengunjungi Perdana Menteri Datuk Seri Dr Mahathir Mohamad dan Speaker Dewan Rakyat Tun Mohd Zahir Ismail.

Beliau juga akan memberi ceramah umum anjuran Institut Diplomasi dan Hubungan Luar dan melawat Petronas, kata kenyataan itu.

-- BERNAMA

ES ES NMO